



No varès mai crodût che i gnotui a fossin rivâts a fâ tant scjas par chêl che al stâ sucedint cumò, ven a stâi burî fûr un virus ch'a al fâs inmalâ e murî tante int, une robone!

A nô ch'ò vin une cjame di carnevâi sù pe schene, i gnotui nus puartin indaûr tai agns, cuant che il prin cjalt ju sburtave fûr a svualâ te bielis gnotoladis d'Istât, che nus scjaldavin fin te meole dai vues. Il lôr svualâ bas al è simpri restât un misteri par ducj. No ju vin mai viodûts a poiâsi su cualchi ramaç e se a fermavin il svual a lavin a taponâsi ta un ceson o sepi Diu dulâ; par dî la veretât nus fasevin ancje un pôc di sgrisui!

A nô frutis nus disevin di stâ atentis par vie che se a brincavin une bieie gjavelade a vevin cûr di peâsi intor cirint di gjavânus i cjavei, massime dopo sunade l'ore di gnot; cussì noaltris si tiravin sul puarton dongje cjase. Plui tart però a varessin capît che nus disevin chest par che no stessin ator pe place.

Cumò invezit a disin che chel virus trement che nus fâs tribulâ al è stât sparniçât dai gnotui, ma se ju vin vûts sul nestri cjâf par agnoruns d'Istât e no nus è capitât nuie cemût podino crodi a une tâl? Lis malatiis brutis a capitavin par solit l'Unvier.

Sarai malfidante, ma mi pâr che chei che a disin chest a stan tignint i voi in sfese! Se a fos chi mê none a disares di sigûr: - A son baronadis grandis, di balonîrs!

di Marisa Gregoris

#1082